



林下堂詩卷九

雲山老人

程塾

藝農

時年七十又五



癸未二

長歌行

天地生物人爲靈沙蟲猿鶴非同倫退居自愛親  
泉石夕鳥歸雲倦客情三十年來一裘葛比鄰旁  
舍未曾嗔松關寂掩渾無事何由意外來牽縈飛  
鳥在林魚在沼百計出之殃其身致使幽徑生喧  
噪魑魅啾啾鬼作聲沐猴舞弄欺我老顛倒天吳

別有因三寸舌屈勿伸怒髮直轟雪千莖匣中雙  
龍忽騰出白日青天風雨鳴幾回拂拭復遲遲而  
曹不過尋常人割雞恥用屠牛手項血羞污金鐵  
英腐鼠擲地弗之顧鳳皇寧共饑鳶爭此生落落  
空懷抱七尺昂藏無偽貌深山大澤亦坦途豈畏  
鯨鯢與虎豹而况區區食肉奴傀儡衣冠胡足道  
高天厚地容古真韜光淪跡甘埋照紛紛燕雀儘  
施爲虞翻一死青蠅弔惟有銜

恩荷

聖明尋章摘句終吾好醉酣往往發清狂李白大言  
皆冷笑

悲黃雀

黃雀小百鳥欺啄無餘粒腹恒苦饑兒童繫足掌  
中嬉狸奴遭之命且危噫金爲裳兮菊爲衣青雲  
有路胡不高飛感此黃雀吾寧不悲

且園風雨

無明無夜幾曾休障霧連雲壓楚州異響亂揮千  
樹葉大聲傳送滿城秋顛風勢欲吹人去惡雨判

教動地愁庾信小園蕭瑟甚不堪惆悵倚危樓

殘荷

南北又西東掀翻勢未窮蕭蕭黃雀雨颯颯鯉魚  
風敗葉無全綠殘花退舊紅歸根着何處還在汙  
泥中

獨夜月

病渴當秋劇幃單引簟涼啼螿依斷壁饑鼠墮空  
梁搯枕雙蓬鬢驚心獨夜牀清宵難得睡而况月  
如霜

中秋雨

別無他技可銷憂插得桂花香滿頭賴有糟醅供  
薄醉不勞風雨送中秋一燈照我真堪笑半榻橫  
琴亦自幽兔影蟾光空在望笙歌何處廣寒遊

掀髯臨風

獨鶴高飛久出籠閒中歲月莫匆匆悲歡但許供  
吟弄愛惡無爭任異同飾幅脩容皆國士大言小  
惠豈英雄人情大半皆如是掀髯臨風兩目空

客到

林下堂詩 卷九  
三  
萬徑無人到君來且小留  
沸泉探蟹眼帶露擘雞  
頭見面多新語開襟散  
舊愁更須謀一醉攜手  
共登樓

雨中植桂將半卸矣

合浦非凡樹傳來友是仙  
馨香已昨日零落又經  
年嶺外和雲濕江頭帶  
月圓移根雖得地恨不  
遇晴天

秋雨

空檐饑雀亂古瓦綠苔  
生癡雨何曾歇蒼天不  
肯

晴暫時風脫木幾處葉  
飛聲寸土無乾地柴門  
遠送迎

雨窗有憶

東北浮雲又變天沉陰  
如晦苦連絲此時對雨  
敲詩瘦昨夜登樓盼月  
圓離緒漫添雙鬢雪閒  
情還憶五湖烟興來倘  
有提壺約依舊春風問  
畫船

秋居

竹下鶴長餒囊中金已  
空繁華歸別院憔悴付  
衰翁留癖轉成趣工詩  
忍不窮秋居何所有老  
樹一

林紅

生日歌

時維九月菊新黃南極一星應壽昌晨起梳白髮  
髮短鬚耆長整冠兮束帶坐我兮高堂願逍遙兮  
八紘偏遊歷兮遐荒山兮海兮兩茫茫飴丸誰致  
驚精香騏驎龍鳳之消息羣仙昏昏醉瓊漿青鳥  
啣桃亦爽期我生之辰胡相忘下視凡儔益蕭索  
酬酢揖讓鮮趨鏘今日今時何所有風鳴落葉東  
西廂七十五歲滿眼空此身以外鶴一雙他家門

館頗喧鬧三十四十爭稱觴冠蓋填門臭酒肉軒  
然一笑同粃糠

掩扉

年來光景未全非古巷幽深靜掩扉屋爲雀穿檐  
瓦亂書無人讀壁魚肥窗前敗葉頻頻墜天外征  
鴻欵欵飛幾日西風雙袖澀白雲何計補秋衣

九日

詎知籬落下昨夜菊花開對此酬佳節因之撥舊  
醅關情頭上髮着意手中杯欲問登高處霜前一

鴈回

俯淮樓早起

易醒浮生夢難禁永夜愁鳥鳴霜後樹人起水邊樓故土思南國青衫寄楚州披幃何所見窗外亂帆秋

秋雨歎

涼風蕭蕭哀鴻嘶天雨迸落秋淋漓庭前叢菊開正好俄然飛翻成離披祇愁百卉同爛死不與松栢相追隨念茲頓覺摧胸臆春花胡早爾何遲志

士暮年甘契闊美人失意恐愆期歲月逝矣追莫及浮身浮世空汲汲

薄暮

薄莫踏秋草家家急晚春樵歸紅葉路僧打夕陽鐘鷺宿羣依水村沽醉殺儂堅持青竹杖或恐化為龍

過晚甘園

掃葉人何在紅黃滿地秋隨風難自整入水不同流小住渾無賴茲來異昔遊老人畏惆愴一漿喚

歸舟

秋窗

性癖耽詩苦認真方窗古案絕埽塵一雙白鶴從  
來瘦幾點秋花他自新戶外悄無騎馬客坐中還  
有食魚人田文已往今非昔未必馮驩是化身

野鳧行

家鴨有規矩野鳧無拘束清明養子沙渚荒秋霜  
着葉蘆花禿夜靜月明風雨聲爭飛總向蘆根宿  
雄呼雌應引雛兒到口魚鰕填滿腹不羨金屏開

翠毛不願乘軒尸厚祿斷梗餘糧無外求悠悠蕩  
蕩恒自足湖海雖寬人事艱但愁一網身難贖

芙蓉歌

淶水芙蓉破蕊出枝枝染就徐熙筆嫩紫柔紅奪  
晚霞麗色酡顏松栢質別有丰神畫未真是耶非  
耶眼昏澁不是美人呼不前錦袍錯認宮娥立霜  
姿自分和秋老不逐春風媚春日欲采未采心夷  
猶露重但愁雙袖濕白首相看奈我何月明影落  
寒塘寂



再看芙蓉

映水兩三枝，經霜色不變。  
西風吹我來，幾回看未厭。  
世間何物比芙蓉，美人初醉面初紅。

折磨

王揚盧駱總蹉跎，未有詩人不折磨。  
借問老翁曾悟否，長歌短歎意如何。

小春

東南風作釀小春，晨霞烘天騰紅輪。  
陽氣灼膚引煩熱，俄然解帶頭脫巾。  
海棠綴花弄顏色，十月蒼

蠅努力出鑽我窗間，紙集我硯池。  
墨飛鳴旋擾驅復來，致令童僕少安逸。  
笙歌鼎沸多豪門，胡不就彼殘杯炙。

廷芬酌我

沙明渚白鴈啾啾，有客酌我湖上樓。  
樓窗四啟琉璃碧，波光抱月擁中流。  
老岸盡皆無葉樹，西風直透羸羊裘。  
天外寒星霜皎皎，壺中歲月興悠悠。  
大杯小盞稱快意，一談一笑儘淹留。  
芬也半酣我醉倒，纏綿苦覺人情好。  
開心寫意能幾時，營營何用

傷懷抱古人白骨臥荒苔功名富貴安在哉三百  
青銅吾不惜明朝相訂此重來

遣事

不過染指爲嘗鼃忽作風波滿紙掀奚物青蠅頻  
入幕連城白壁竟何寬枯楊待雨生新耳衰草萌  
春憶舊根人事會須留冷眼獨能無恙度朝昏

哀人生

女爲右男爲左降生渾若脫枷鎖紛紛跳擲滿人  
間億萬百千極繁夥分形別類性各殊愚者胡多

賢者寡云何區貴賤迺復別高下哀哉壽命終無  
一而非假生前我哭人死後人哭我哭我與哭人  
無可無不可

面壁行

平生嗜懶性尤真今愚呼我古愚人天地大矣江  
海深菱角雞頭誰與爭衣冠七尺同敝帚奚用黃  
金高北斗高北斗兮可奈何黃金不爛骨已朽千  
秋事業口囂囂薤露蒿田死十九桃李門前幾度  
栽一番花落一番開樽前酒漲葡萄綠坐上紅傾

琥珀杯綺席瓊筵爭爛漫金鈿翠袖嬌相偎鴛鴦  
七十傷心麗賓客三千帶笑回鶯聲已卷如簧舌  
蝶夢還尋錦繡堆萬卉千葩渾未覺一宵風雨安  
在哉樂極悲來追莫及歲月模糊醉中失山陽耆  
舊盡凋零陌路相逢少相識青衫白帽遠驕奢閉  
目垂簷門不出一從歌舞散如烟廿年檀板無消  
息而今直似老頭陀坐破蒲團惟面壁

且園探梅歌

閒穿林落飄殘葉步繞池亭破古苔跳弄有聲松

竄鼠驚飛無定鳥頻窺長廊十丈罕人跡瘦藤一  
握探春來逾高越下偷着眼索得梅花第一枝將  
開未吐香猶吝嬌紅嫩白美人姿最是江南消息  
好漏洩風光泥客思未免有情生悵惆孰能無意  
苦低徊試欲折來還放手但愁一夜霜花摧

早醒遲起

獨枕不嫌短孤衾倍覺涼鴉啼殘夢月人臥曉樓  
霜漁市喧臨水鐘聲直到牀依然睡未足莫謾著  
衣裳

徒步行

舍南舍北皆鄰里朝夕往還無彼此巷頭巷尾咫尺間曳鞋豈惜搖吾趾安步當車原非迂况有兒童代杖扶徒行合是尋常事奚用區區說大夫馬四足鳥雙翼我欲從之勢莫及歸來倚柱自歎息

雨齋留竹村著棋

淨喜琴書潤幽宜几杖清同窗分雨色一局動棋聲卷幔餘殘滴看雲駐遠情天涯有離別煮酒話生平

短歌行

白金買人面頃時反面顏色賤赤金買人心詎知金盡心易變辜舊恩生新怨不須按劔說當年請看王謝堂前燕

落莫歌

百年何所事終日賦新詩壯心無憑寒如灰吾甘棄擲同蒿萊君不見李白佯狂人欲殺惟有杜老憐其才噫戲得一知己何處來落落莫莫幾窮哉

九載

九載餘生少見憐一茶一飯總由天酒逢俠客有時醉詩遇非人莫浪傳摘句尋章心未厭青肝苦  
膽志尤堅其他盡屬花前夢夜雨春風過耳邊

枯徑

嚴氣鐫肌骨老面受先皴今日喜晴和徐步出前  
庭庭樹不留響風聲忘怒嗔霜染草頭白寒添松  
色青興衰見本質榮瘁異冬春不覺久延佇枯徑  
寂無人

好靜

淨牖開千卷苔墻遠四鄰有文難送鬼無富可驕  
人苦竹時堪倚寒松舊可親衰年惟好靜百事不  
關身

松風歌

君不見黠鼠不畏虎山鬼每輕人又不見出大言  
者器必小求速富者身先貧三寸舌思封萬戶一  
竿竹欲釣長鯨卑俗可憫浮誇錯忤喪天真吾當  
高蹈烟霞臥聽松風萬壑鳴

疎放

天地容疎放柴門靜掩局寸心空自赤兩目爲誰  
青顧我清難濁憑人醉或醒浮生且高枕安穩慰  
餘齡

白芙蓉

仲冬月四日過且園見芙蓉根底挺出白  
花一枝比玉無疵清芬可玩雖開非其時  
然物希爲貴焉可無詩

冬陽淡薄霜凝結園林索落百卉歇根枯葉爛芙  
蓉死暴出一枝花勝雪忙裏失之閒中收無心到

眼情更熟美人雖美臭皮囊茲花脫胎且沒骨超  
塵越俗亦神仙肯食人間烟火食左看右看頗無  
厭頻留頻去胡屑屑但恐月來花不知白玉欄前  
同一色

寒夜

重疊夢中頻易境往來心事每難償鴉驚殘月啼  
空樹鴈促西風咽曉霜舊被生寒推枕起宿爐尋  
火撥灰忙不因鬪鼠供閒寂尚有何人繞我傍

對鏡歌

二三十歲至七十此鏡藏來非一日閒時啟篋拂  
流塵豁然眷宇開光明觀身卻在虛空裏真中之  
假假中真對面原知同色相掉頭頓覺兩無親人  
情合向此中看大地皆然未足評

空齋雨雪

安穩空齋裏披裘獨擁爐灰深埋芋栗榻軟壓氍  
毹竹動風搖雨窗鳴雪迸珠重幃漫高卷寒氣恐  
侵膚

且園早晴

今晨拄杖梅花下昨夜寒林雨雪中渴雀許多爭  
啄凍饑鴉無數亂翻風霜餘瓦面痕猶白日過墻  
頭色乍紅冷到腳跟渾未悟低腰縮項走西東

過河北

河南度河北兩岸夾晴川野水漁初散殘陽網半  
懸雲穿隔浦樹風引過橋烟欲赴青帘約應須辦  
酒錢

臘梅歎

臘梅纔放兩三枝厲雪嚴風底死摧人生苦磨折

物我苟如斯年年歲歲爲花愁開不逢時那自由  
可憐萬萬黃金蕊一分無恙九分休

山陽宅

枚里山陽宅幽居得所娛孤吟酬歲月高枕遠江  
湖一室終吾事百年老此都悶來誰共遣小醉亦  
良圖

東閣

迎陽橫曉榻面閣敞新霜藤蔓乾垂瓦松鬚翠拂  
廊寒塘鋪硬碧凍草臥枯黃不厭成孤寂天邊有

鴈行

簷下花

花放無人覺花落鮮人知際此高檐下黽勉相撐  
持感君多顧盼寒暄經已慣尺土安其根翦伐保  
其存春來縱使風光淺雨露雖微亦是恩

井蛙歎

雲鶴地天寬井蛙眼界窄如內古甕中何由覩白  
日我今爲爾謀請君勿浪出不見青草湖一網千  
百十



書感

玉石誰當辯是非任屈伸卿還用卿法吾自守吾  
真不作揮戈客聊爲退舍人魯褒未省事有論著  
錢神

冬日送別

驅車風雪路去去莫愁貧行李居然少鬚眉不厭  
真從來天下士大半布衣人努力須前進京華及  
早春

暫往

頭戴鼠耳巾屐齧霜根路陰寒濺髮毛敝裘難駕  
馭兩目接枯林未諳冷中趣風吹雲不裂凍結冰  
如鑄嚴威苦堅牢茲焉何所慕回憶臘梅花新黃  
蕊初吐一夜感摧殘風欺雪亦妬花既不可留人  
亦不必住

且園雪後

凝瑛白爛漫剝落粉模糊竹以玉爲葉松將銀作  
鬚煖寒思掃徑

天寶遺事王元寶每大雪之際則令僕夫門  
巷掃雪爲徑迎揖賓客飲宴爲煖寒之會

對雪

想提壺誤入圖中畫山林笑我無

書興

悲歌慷慨終無補  
儒雅風流亦我師  
海內篇章唯道好  
衆中談論莫矜奇  
一時好尚知誰許  
萬古妍媸任爾爲  
敢謂潛名抱幽獨  
實難驅策逐兒嬉

早起

早起視天宇  
西風又北風  
繁霜萬瓦白  
冷日半樓紅  
汲井勞晨爨  
燃爐待小僮  
奈何呼不起  
只戀布衾中

林泉

遊心身以外  
結念在林泉  
幽鳥懷良木  
潛魚樂深淵  
罟弋罔所施  
慕者空垂涎  
守此仁義區  
安享義皇年  
萬物有定分  
胡獨人爲然  
脫若違其性  
鳥將入水魚上天

頽然

苦吟頭已白  
對酒面先紅  
無量非關命  
工詩不在窮  
愁逢畢吏部  
慙遇杜司空  
衰朽終吾事  
頽然一老翁

遣悶

竹葉垂簷重松陰覆院深幽人閒白日壯士輕黃金日月雖同照漁樵各一心酬恩空有劔流水久無音

對月飲酒

對酒月在杯舉杯月在手酒盡月亦無傾杯月入口胡然上青天高空一鏡縣不知辛苦幾多年夜夜飛來照綺筵拚卻十日醉一瀉酒如川洗盞滿斟千百過個個杯中對月圓

閒人

元非容易作閒人七十年來遭罵嗔不醉即眠休問我有金便散豈謀身盈虛同是一天地禍福曾無兩鬼神犬走雞飛客散矣堂前不用再生新

夜坐

竹爐擁火坐深更雞犬無喧漏滴清孤枕不留恩愛夢殘燈挑盡古今情生前事業千鈞重死後功名片羽輕各有升沉君莫笑衡門歸老一書生

讀書

座有奇書隨意讀居無俗韻喜心清早梅就我生

春色獨鶴過庭時一鳴但使白雲常不負從教皂  
帽送餘生功名富貴草頭露流水悠悠萬古情

家居

老笨如顏石無靈性自頑地平非蜀道門靜若禪  
關影動形先動心閒夢亦閒雖然安澹泊葷酒未  
全刪

模糊

閒堂靜院守雞棲雙眼模糊未易篋霧裏花枝蒙  
錦繡池中月色隔玻璃沾衣細雨難防濕撲面輕

沙待指迷視物無權空躑躅魚牋免筆漫留題

臘日放晴興到成詩

物色生態羣象動晴雲煖日相鮮新即防臘意傳  
虛幌更遣風光媚老人梅向春前思努力柳從雪  
後露精神瓦壺願罄杯中涿醉舞狂歌總是真

雨過

天遣南風駕雨來恩膏已遍老莓苔飄零斷鴈隨  
雲散收拾殘陽帶濕回綠酒紅爐未可缺歸鴉暮  
雀休相猜客心莫漫成枯寂的有寒葩近屋開

殘雪

嚴霜作冷報天晴  
悄院無人客思清  
幾點疎星半輪月  
一簾殘雪夜三更

望月

寒光今夕滿霜月  
十分明魑魅形難掩  
山河影更清  
有懷心自遠  
獨立夜無情  
萬籟此時寂  
唯聞鴈過聲

去來吟

慣知冷暖欠均勻  
飽去饑來莫認真  
舊燕不歸新

燕至孟嘗門下豈無人

寒燈吟

清漏滴滴天霜凋  
羖羊裘擁風生驕  
一燈明滅苦向人  
微烟裊裊光不高  
枯琴冷硯少顏色  
竹葉梅花影動搖  
倦眼祇宜隔書幌  
忍看膏火相煎熬  
但愁心血成灰燼  
寸草含春莫浪挑  
烏皮几在吾何有  
月色雞聲夜獨饒  
垂照幸堪供坐臥  
孤情難免世兒嘲  
君不見石家蠟燭頻  
頻翦焰落成堆  
淚未消

望雪二首

滿目山陽雪紛紛壓楚城河山無二色天地絕纖塵苦逐西風亂能令白髮驚四方同一望獨立倚樓楹

近岸柳飛絮遙汀玉映沙入池元是水綴樹竟爲花白屋寒無敵紅爐暖幾家飄零迫歲暮在在繞天涯

雪霽

弱柳含情欲挂絲避人蜂蝶尚遲遲風光變暖驅

殘凍梅雪爭春能幾時晚日晴霞相掩映停雲宿霧兩紛披一鈎嵌破青天色新月如睂隔樹枝

寒鴉

一枝聊借宿近我小樓傍未敢啼殘月何曾怨曉霜低飛沙渚白斜度野雲黃向晚尋歸路蒼茫帶夕陽

除日

儺翁儺母古人爲臘盡春回兩不知山鬼浪傳驚燁爍吳兒豈合賣猷癡敢煩送歲金圖燕但願酬

勞酒祭詩賸得數杯容小醉睡鄉安穩復何疑

林下堂詩卷九 畢

家比部雲山老人以詩雄大江南北者五十餘年  
矣 嚙 久依廡下而實未窺其藩近始丐得全集而  
讀之如入山陰道中萬壑千岨應接不暇如登多  
寶船奇光異彩奕奕照人而口不能名其物又如  
遊海上波瀾浩渺縱目無際浴日沐月而三神山  
因風去來可望不可即也大抵胚胎騷雅吐茹漢  
魏以浣花爲骨而參以謫仙之超邁昌黎之雄奇  
香山之春容博大時而幽峭時而溫麗時而沉鬱  
奧衍則張籍王建義山飛卿昌谷玉川不能罄其

體制而適自成爲一家之詩其詩爲雲山樓集十  
七卷續集十卷合計幾二千首庚辰以後築林下  
堂成則又以名其集而自署曰雲山老人歲得詩  
百數十首或二百餘首至癸未又積至九卷嘻可  
謂富矣山中日暇間出以誇客客曰今之號詩家  
流洗刷章句揣摩聲調改塗點竄竭日月之力出  
一二以示人非不鏗然燦然也及彙而視之不數  
首復矣不數十首窘矣其不苟因循力求矯異者  
更唱疊詠又往往乖隔支離流於謬悠弔詭而失

其故步何老人詩積三千首詞不冗意不竭出奇  
無窮日開生面牢籠百家而卒以自成一家乃若  
是嶸應之曰客不觀雲山之變態乎夫雲無心而  
出膚寸而合自若也忽爾如花葩如樓臺如車馬  
如旌旛麾蓋如江波海潮如蟬翼魚鱗如鵬搏鳳  
擊鯨呿鼉拊龍虎之跳臥隨天風以寫形而雲不  
知也夫山峨嵋而高幽幽而深自若也忽舊如妝  
忽淨如沐忽黯如愁忽媯如笑忽藻繪爛然如翠  
如黛如粉如丹如赭如染朱綠元黃如紆青紫如



錯綠鏤金因晦明而易色而山不知也今日之山何非昨日之山而已非昨日之山今日之雲已非昨日之雲而何非昨日之雲蓋雲至變者也變而不變其變乃神山不變者也不變而變其變愈不可測此天工也人工有窮而天工無窮老人之以雲山名其樓而因以自號也殆不禁豁露其端倪矣其詩天之造化又安窮乎客何異焉今老人甲申詩復成集授梓嶸未及讀而屬爲之序客又疑嶸之無以寫其崖畧也嶸請更申雲山之說曰今

日之雲必非明日之雲而何非明日之雲今日之山何非明日之山而必非明日之山雲山之變態不可知雲山之變而不變不變而變其本態可知也則讀老人癸未以前之詩甲申之詩嶸髣髴得之已並甲申以後之詩彷彿得之已請書以質之老人其掀髯一笑否乎乾隆乙酉上元日族在嶸

謹識



林下堂詩卷十

雲山老人

程鑿

秋水

時年七十又六

甲申一

元旦

一枕爆竹聲喧呼  
襍雞狗早起不容遲  
舉幃接星斗  
坐我燭光中  
軟風吹戶牖  
詎知新歲人  
還醉隔年酒  
隱几得清幽  
琴書列左右  
俗事都不聞  
誦祝遠佞口  
莫往亦莫來  
無是亦無否  
天運隨自然  
欣欣逐梅柳  
曠哉古人言  
牛翼與馬手  
吾當攬春華

春華滿鬢賒

人日雪

杯浮人日酒客醉草堂風昏樹寒雲外顏垣凍霧  
中梅花隨冷暖雪片自西東悶極情難着吟詩許  
自工

晝冷

竹屋棲寒色冰簷鑄硬泉烟開隨凍裂草合與雲  
連一片琉璃地四圍玳瑁天暄風慳送暖何以慰  
衰年

燈花吟

寄跡如萍滋生非水以火爲用以草爲體背日能  
明入夜知喜蕊蕊花花灰飛烟死

夜寒

清宵寒益劇昨夜雪紛紛月影淡於水春冰薄似  
雲陰晴渾莫定明暗幾曾分碧幌青燈下同誰酒  
共醺

元夕遣意

生憎雲妬月不分燭燒花綺席歸華廈青氈屬舊

家樽無新釀酒庭有後棲鷗何計酬佳節憑軒客  
思加

乍晴

乍晴猶恍惚非霧即多風解凍全無補吹灰竟有  
功重幃休浪卷春酒莫教空得免饑驅累安然一  
室中

雪窗

一月西風春無權苦草寒烟凍益堅山石裂來驚  
破竹雪花停處訝鋪氈狐裘老却晏平仲驢背吟

殘盃浩然綠酒紅爐吾不吝囊中還有青銅錢

東風

草覺萌生意春疑變臘容鶯花新不厭琴劍舊相  
從苦茗勞親煮名香喜自供以閒酬一日萬事敢  
辭慵

吳越書

兩軍先後請行成成敗同歸萬古塵傾國自來非  
醜婦讒言早已惑奸臣夫差信是昏庸主勾踐終  
爲背德人九術用三文相死臥龍山下實酸辛

興來

耳目緣初動園林景漸賒青方歸柳色白未到梅  
花蜂或有時出鶯從何處譁興來小擇地隨意坐  
晴沙

咏紙鳶

楊柳春風二月天家家剪紙作飛鳶一痕嫋嫋兒  
童喜百丈迢迢掌握權不恃吹噓難假借若無牽  
曳怎攀援鳳皇未識爲何物衆鳥毋煩爭後先

養生

繞徑滋蘭蕙勾衣去蒺藜不嫌衰鬢白還守故林  
栖屈曲寧同蚓飛鳴豈羨雞養生吾有術高枕夜  
低迷

苦雨

陰生大地望濛濛老霧昏黃勢若籠苦雨幾曾分  
晝夜顛風不自解西東雲帆雉堞蒼茫外水驛山  
橋黯淡中爨冷絕憐烟火寂窮閭應有信天翁

春酒

春酒連三月杯盤互勸酬人皆安醉飽我獨遂清

幽飲啄非無命甘肥不外求此生原浩蕩與物復何尤

清明

西風逐寒食苦雨送清明晝晦氣蕭蕭青陽少權衡晒彼巫山女揮灑厭六旬致令繁華節陰陰壓楚城暖客眼前少重裘能幾人但愁坤軸裂氛霾尚崢嶸安得鞭陽石普天瞻紅輪吾當攜斗酒花下醉餘春

晴

橫空星斗報新晴始賀皇天收雨聲喜心顛倒眼欲旋明鏡飛來月一身今夕且睡睡未穩小巷傳更露氣清渴思來日踏青草叫破曉鷄天雞鳴詎知蝴蝶先我至百花零落可憐春蝶抱花枝渾未解何緣更有惜花人

伍相國

勾踐幾危哉夫差計何左仇怨非尋常興衰由自取向使不伐齊焉爲越所有即今越亦亡遑恤先與後獨憐伍相國一怒江濤吼

雨止散步且園

滑滑石頭路丁丁屐齒齊蜂鬚全帶濕蝶粉半沾  
泥雨過霞初舉雲歸日已西紅飛花滿地綠漲水  
平隄步懶經橋歇烟光咫尺迷

春郊極目

桃竹杖頭瓢笠兼青鞋白襪路非淹嬌桃泣雨紅  
初瘦軟草留烟綠暗添傍水漁家橫繫艇隔花人  
面半開簾春光可可傳消息露出葱根玉指尖

悠悠

歲月任悠悠柴門對水流烟波湖上權風雨竹間  
樓榭散功名薄蹉跎老病休山林容賤士一飽更  
無憂

湖上草堂

柳岸催輕榜墻頭叫午雞人凭竹檻水燕墮草堂  
泥日暖花思睡風酣蜨欲迷晴明雖未久遊屐遍  
東西

齷齪行

天南地北分炎涼物我好尚殊圓方孔雀綴經牛

木下堂詩 卷一 六  
舐觸金華翠尾庸何傷棲梧食竹傳鸞鳳無端蹲  
坐來青狼忍能對面弄矚目齷齪小兒欺老蒼卑  
俗反遭人眼白吹燈恥與鬼爭光歔髯一笑徹雲  
表陰類惡物都潛藏

悶極

空齋守泥滓終日坐如癡久雨花多負三春病未  
移陰寒空向火老鈍欲無詩悶極當窗望西風吹  
柳絲

傷雨中海棠

疾雨恣顛狂海棠春不睡將花比妃子多少傷心  
淚

詠石

露滴烟埋歲月湮黃金能假亦能真迄今以往終  
爲石五百年前曾濟人

題江上釣魚圖

慣習烟波客扁舟一葉橫世間塵網密江上釣絲  
輕倚櫂看雲起聽潮待月明晚來泊洲渚心與水  
俱平



紫藤花下

仰面立多時  
蠶歡蝶亦喜  
一架紫藤花香風傳十里

春去

一庭新綠晝生寒  
燕子飛飛客思單  
未是無心同草木也  
應隨意倚欄杆  
春於去後知難挽  
花到殘時不忍看  
寄語閨中薄命妾  
漫勞團扇掩齊紈

放歌

晴光入牖撥書起  
茫茫四顧誰知己  
東西南北幾

多家未識何門堪  
住趾李白回船賀  
監亡伯牙擘琴子  
期死流輩蠢蠢胡足論  
青眼高歌吾老矣  
千人萬人互唱酬  
紛紛元白滿天地  
我有新詩何處吟  
雲自孤飛水自深

野望

出門迎暮色  
極望草連空  
雲氣山山白  
霞光樹樹紅  
梵鐘流水北  
汀月古橋東  
向夕忘歸去  
倏然憶

遠公

為湛真寺  
朗極大師

瞥眼

林下堂詩 卷一  
星馳電轉送春秋肉食從來無遠謀犬馬殷勤欣  
有術雞蟲得失了難休感時鬱鬱傷懷抱回首悠  
悠亂客愁瞥眼光陰草頭露儘教龜鶴笑蟬蟀

衡門

衡門容老醜賤子遠矜誇居世祇如此百年何所  
加繁華機上錦富貴雨中花別有乾坤在遊仙問  
碧沙

清夜

白家仙鶴睡應熟西域葡萄罇已虛半榻橫琴空

拂拭一燈照夜自蕭疎不求入夢爲蝴蝶但願將  
身化壁魚枉殺少年成孟浪老來能讀幾車書

野草

野草無名生復生不分平地與高原籠烟絡霧疎  
能密軟碧柔青滅斷痕着處莫嫌根蒂淺花時亦  
有蝶蜂喧繁英瑣瑣他自好似與百卉忘卑尊長  
養天地無巨細妍醜均霑雨露恩寸土立合雖不  
廣牽枝引蔓欣推援致令千里萬里悲行客車輪  
馬轂窮晨昏春水迢迢連岸濶秋風颭颭逐鷗翻

一片夕陽迷去路年年空自怨王孫

牡丹開後

花開嫌太盛花落轉生愁富貴朝雲散榮華暮雨收  
香歸蜂不戀色罷蝶難留好事隨春夢春殘夢亦休

芝蘭歌

天地無叅差春秋異寒燠志士守清貧常人多濁福  
文采繪其衣甘肥填其腹脩容寓危機藏金保庸碌  
他家苦經營吾道自蹉跎不見芝與蘭終焉

老窮谷

烟隄

馬蹄酬軟綠燕嘴啄餘紅問柳鶯聲合呼舟野渡空  
夕陽流水外春色落花中莫景真堪惜刁騷兩鬢蓬

自嘲

架上非無書力學今已老熟讀不厭多讀過即忘了  
所愧白魚肥我饑他自飽且喜未弄麀幸免人絕倒

平臺

清風左右至落日上平臺梯徑行愁滑松陰掃不  
開看雲垂鳥翼枕石臥莓苔得倦且歸去何妨去  
又來

步至澗河

出城兩眼新草色望中勻散步四郊外行吟一水  
濱天空惟見鳥日暮未逢人咫尺東門路投竿有  
釣緡

茫茫

茫茫何處津忽忽百年春多病非關老長愁不爲  
貧兒孫遺累重仇怨結來新慚愧爲人父難酬宿  
昔因

園鳥吟

夏木陰涼風自掃翻枝踏葉喧繁鳥呼雛引匹任  
高低或飲清泉或啄草一叫百鳴聽者愚花落滿  
頭不自曉愧我閒居畏寂寥門掩蒼扉人蹟悄黃  
鶯紫燕足勾留別有他雀知多少相親相近若友  
朋娛耳悅目堪忘老可憐馴狎如家禽松簷竹院

頻迴繞東園西園勿浪飛危機觸處終難保危機  
觸處終難保叮嚀反復爲君道鳥兮鳥兮爾有知  
安棲合是吾園好

池亭

池亭烟草此日落小橋西片片荷平水尖尖笋出  
泥空梁憑燕去老樹許鴉栖無物留胸臆悠然阮  
與嵇

北窗

輕燕逐飛紅草頭動新綠風來人不知影搖一窗

竹

無求

萬事都隨分此身何所求十年新舊病一卷古今  
愁采藥供晨夕吟詩寡唱酬吾人山野性鹿豕許  
同遊

明月

明月雖然好頻看覺損神他家有離別休照倚樓  
人

芍藥

十載夢揚州巡欄空繾綣美人期不來芍藥開何  
晚

閨中四時歌

年年綠草飛蝴蝶桃花開過李花歇  
泉先淚盡荷盤珠班姬捐却團團月  
涼生暑退復經時折梅夢斷嶺頭雪  
一去不回竟不回巫雲峽雨雨情絕  
坐愁行歎思欲狂銜書青鳥底相忘  
孤衾夜夜減餘香半醒半睡幾迴腸  
朝來早起拂明鏡鏡中失却雙鴛鴦  
迢迢目斷斜陽路天際歸舟江畔樹  
賤妾

懷貞誓不移男兒錯被封侯誤  
山上山人何處願為枝上之啼鶻  
不作風前之柳絮

舫軒四月

朱櫻垂火齊新竹過墻頭  
老况人同鶴清寒夏似秋  
風閒雲意懶林靜鳥聲幽  
我憶蒼梧客時竹村嵩山有東海之遊  
仙蹤何處求

相見歌

斷不期君來君來疑隔世  
胡然皆老夫竹馬曾同戲  
回頭六十春轉眼如夢寐  
其中歷險艱問荅殊

木下堂詩 卷十 三  
瑣細嗟哉名利區輕風吹鳥毳嗟哉死與生離別  
何足計勿若兩忘言一醉空天地

病中遣興

短髮森森努力新蒿牀竹几苦相親潛名羨爾披  
蓑客忍口輸他食肉人病裏關心惟藥物愁中攬  
鏡欠精神閒庭一樹櫻桃熟臥聽鶯聲過耳頻

江南

遠道思綿綿縈空飛柳絮風從西北來雲向東南  
去君行不見歸君留不知處

石榴花

庭前石榴花惜哉好顏色真紅奪朱砂

叢話石榴從新羅國來者其花

萼皆真紅色

珊瑚攢點筆炎燄不生烟丹心惟向日何用

結子多秋來不堪食濺齒復酸心含情意蕭瑟

新竹

新竹復新竹年年長子孫雲霄終有托雨露敢忘  
恩莫漫穿鄰舍還須守舊根他時逢客到或免鳳

題門

午日

今年三月三自飲還自醉今年五月五不飲祇多  
睡白日戀匡牀時爲病所累及起檢藥囊酸苦別  
其味青赤入肝心次第經炮製若或竟不死亦復  
了無事蜀葵紫如袍石榴紅似熾亂插古磁瓶聊  
存佳節意几席缺盤盂樽壘色顛悴一切空諸有  
始悟空中趣獨憐楚大夫去國身同棄悠悠湘水  
流千載冤臣淚胡爲好事者幻作龍舟戲嗟哉競  
渡人喧喧滿天地

退避吟

狹路狹路相逢退步臣苦饑君飽餽君食甘瓜我  
齧蒂君擁裘我被絮君乘堅車我着屨各自東西  
南北去君請行臣請避臣安貧賤君且富貴

珠湖五月

誰家移畫舸何處按歌聲蒲柳此時綠園亭他自  
新臨流思往事觸目損精神原是一湖水都非舊  
日人

病宿春雨樓

青燈一點竹間樓有人樓上擁孤裯無數水鳥聲



林下堂詩 卷一  
啾啾天陰雨濕聽者愁病苦纏身若贅瘤君能安  
處我當休已經半載忘肉味况復一月不梳頭筋  
疎力嬾難自謀但恐官家賣老牛

湖上聞琵琶

舉頭月在天低頭月在水水面泛輕橈簌蕩烟光  
裏忽聞琵琶聲先入愁人耳掩耳不可聽我悲他  
自喜

古詩九首

簾外草纖纖中有雙蝴蝶忽驚團扇風雙飛復雙

歌蝴蝶不相違人生苦離別

憶昔桃李津燕子啣泥處一別春風亭知被春風  
誤

春時何處妾思君高樓楊柳暮江雲冬來何處君  
思妾金臺明月燕山雪南北寄書歲月遷相思一  
夜梅花發

漏盡欲無聲薰籠夜不熱涼風入羅幃殘膏薰氣  
滅自解石榴裙誰理鴛鴦結半開翡翠衾半卷矍  
瑜月君夢或相通妾夢與君接

妾夢越江河風波不可渡一夕生羽毛傍徨驚四顧不見望夫山飛上帝猿樹

妾守空房裡君行燕趙間可憐薄命妾臨鏡未顏飛花不擇水遊雲不擇山望望終弗及惆悵邈難攀斑斑雙淚落狂夫竟不還

白蝶戀青草黃鶯轉綠楊當窗罷琴瑟曲盡意難忘將欲寄尺書此書寄何方君情如不負願作紫鴛鴦

落葉多秋風春萍少根蒂男兒心性易轉移磐石上天星墮地暮暮與朝朝含情莫告訴不愁去不來到愁來復去

夙夕結婚姻歡娛及年少今非桃李姿恩情難復道棄却舊糟糠贏得新窈窕舊人出門啼新人入門笑一笑復一啼請君自思之

臨水

臨水軒楹敞清風吹芰荷鳴鳩相應蒼老樹自娑娑無命邀朱紱安心臥碧蘿浮名終是累何用識人多

獨坐吟

輕易勿見人見人勿說話寄言賈與商老牛不堪賣

龍舟曲

五色飛幡踏浪掀張燈鬪鴨水上喧龍舟日夜爭  
熱鬧閒官散秩醉東園

風雨泛舟歌

赤蜻蜓黑蛟蝶接翼聯羣飛不歇飄飄忽忽意何  
爲直倚簷柯搔短髮無端蜃氣結層陰海霧昏黃

雲沉沉風聲到耳驚落魄雨點打人涼入心其時  
閉影垂簾幃有屋併幪且庇身不知何事經錯忤  
元冥飛廉相怒嗔少焉風定雨亦罷尋歡豈惜芒  
鞋破頭欹竹笠手扶筇五月披裘奚足訝不厭衝  
泥問釣磯烟波一舸吾堪駕珠湖今日喜無人但  
見無數白鷗齊上下

窗間

新燕觸簾欵欵飛袷衣纔換又單衣雲窗日色風  
前薄花徑苔斑雨後肥顏老漫嫌青眼少蹉跎常

念故人稀辭高就下堪容拙二十年來早息機

螢火

出處去聲久相忘何心戀絳囊因風頻上下逐水任  
低昂暫許窺閒幔旋看過別墻終憐一點火到底  
非真光

閒居

環軒榆柳綠成圍蘿薜垂簷竹隱扉破悶不妨吾  
獨醉忘情若與世相違憑他蜂蝶生喧鬧莫遣風  
花問是非倦鳥歸雲人意懶落霞何事苦爭飛

夏日吟

吾園幽事難假借春雲臘雪都無暇看罷梅花及  
芍欄圓荷翠竹又長夏新花故葉遞年年回首浮  
生亦傳舍千歲懷憂達者嗤展書且讀風簷下解  
衣原是舊青衫工詩直欲窮鮑謝移牀喜就松根  
涼拂蠅敢惜白團破蓬蓬兩鬢老婆娑七十六年  
彈指過傍人不用問行藏瘦藤嫋嫋瓢一筒寡合  
絕無愁呂儔一夕毋煩千里駕祇有栖鴉共寂寥  
月明伴我柴門夜

鷗

荷葉岸傍留不住  
蒹葭影裏意如何  
鷓鴣鷓鴣尋常見  
河海江湖到處浮  
自信一生能浩蕩  
豈知終日在風波  
機關專伺忘機者  
雲水烟光莫漫過

傷鄰家去屋二首

翻因有子難留屋  
去屋如君我亦哀  
池館一朝都入券  
牡丹昨日爲誰開  
負郭有田酬客債  
移居還喜傍雲隈  
青山已付他人去  
黃犬空隨舊主回

已醒

已醒前宵夢還餘  
此日身親朋輸一笑  
歲月暗傷神  
我有皆人有人貧  
勝我貧天心於此見  
不必問前因

繫艇

柳邊初繫艇  
烟際亂鳴蛙  
待月空亭得憑欄  
一水賒短籬  
從蔓草斷岸補蒹葭  
池館多零落  
何心問酒家

閨情

林下堂詩 卷十  
織織出素手好女名羅敷翠袖倚朱閣珠簾上玉  
鈎桐花能墮淚萱草豈忘憂不分雕梁燕啾啾語  
未休

窗前

一盃香茗一卷詩置身何幸太平時十風五雨原  
周徧百草千花任早遲人我賢愚休較論後先貧  
富莫相疑窗前有竹亭亭立且引新涼入鬢絲

不雨

北窗無箇事龍品試新茶柳色一簾碧桐陰滿院

遮枯池窺白鷺淺井出青蛙不雨多炎氣清風何  
處賒

蟬來

五月廿九日當午解葛締坐愛涼陰下槐柳蔭荷  
池滌我蠻溪硯吟我錦囊詩意取謝煩熱受彼清  
風吹突聞響林際如羹沸不移乍聽耳根新久聽  
精神罷營營復嘈嘈譁囂亂幽棲奈何欲去不去  
翅猶弱夕陽將落未落聲漸低轉眼異旦夕物理  
勢難齊見爾出穢壤見爾據高枝大呼大叫勿居

奇縱能蛻化幾多時螳螂奮臂雀延頸試問爾蟬  
知未知

林下堂詩卷十 畢

